

# Specular cun nutriment resta vinavant pussaivel

In cler na a l'iniziativa dals Giuvens socialistis

■ (sda/anr) **Da scumetter sin pretschs da nutriment che cordan u creschan na vegn betg scumandà en Svizra. La gronda pluralità dals chantuns e la maiorità dals votants han refusà l'iniziativa dals Giuvens socialistis.** Cun il «na» da questa fin d'emna n'è la tematica betg liquidada. Ils plans da regulaziun en auters pajais han motivà il cussegl federal ed il parlament d'era far preparativas. Ina clausla en la nova lescha

per la fiera da finanzas dat la cumpetenzza al cussegl federal d'introducir limitas per speculaziuns cun derivats cun nutriment.

Igl è però avert sch'il cussegl federal fa insumma diever da questa cumpetenzza. El veglia s'orientar al svilup internaziunal, ha ditg cusseglier federal *Johann Schneider-Ammann* gia avant la votaziun. Plinavant han las organisaziuns d'agid lantschè in'iniziativa per la re-

sponsablada da concerns. Quest'iniziativa less ch'ils concerns internaziunals cun sedia en Svizra ston s'obligar da resguardar sin tut il mund ils dretgs umans e standards d'ambient.

L'iniziativa «nagina speculaziun cun nutriment» han sustegnì ils Giuvens socialistis, la ps, ils verds, organisaziuns d'agid ed intginas organisaziuns da purs. Els n'han betg mo vulì restrenscher la pussanza da singuls acturs, mabain in-

summa vulì scumandar fatschentas speculativas cun materias agraras u cun nutriment.

Durant la crisa da finanzas èn investurs guntgids sin talas fatschentas. A medem temp èn creschids a moda massiva ils pretschs da tschertas vivondas. Ils iniziants vesan qua in connex e partan da quella che la speculaziun maina a pretschs pli auts e contribuescha cunquai a la fom sin quest mund.